

## Christliche Predigt.

es ist erlöst vom Teuffel/ Todt vnd Hellen/ vnd ist ein Erb des ewigen Lebens/ wie denn Christus spricht/ Marc. am 16. Wer glaubt vnd getaufft wird/ der wird selig werden/ das ist/ wer an Christum Gottes vnd Marie Sohn/ als an dem einigen Seligmacher/ glaubet/ vnd ist auff die heilig Dreifaltigkeit getaufft/ der wird selig. Vnd wird also in der H. Tauff/ die Widergeburt/ vnd Erneuerung des H. Geistes/ nicht allein bedeutet/ wie etlich lehren/ sondern auch exhibire, verrichtet vnd geleistet/ daher S. Paulus die Tauff nennet ein Bad der Widergeburt vnd Erneuerung des H. Geistes/ Titum am 3. Das ist/ in der H. Tauff wird der Mensch wahrhaftig new geboren/ daß er wird mit dem Blut Christi von seinen Sünden gereinigt/ Ephes. 5. Es werden ihm wahrhaftig seine Sünden allda durch Christum verziehen/ er wird ein Kind Gottes/ vnd ein Erb des ewigen Lebens. Item er wird wahrhaftig erneuert/ daß sie der H. Geist auß seinem verstand vertreibt die vnerkannnuß Gottes/ vnd zündet in ihm an/ das Liecht der Seligmachenden erkannnuß Gottes. Item er dempffet in seinem willen vnd kräften die böse lüsten/ vnd erweckt in ihm geistliche gute gedanken/ vnd bewegungen/ wie der H. Er. Christus spricht/ der H. Geist führe vnns in alle Wahrheit/ Johan. 16. Item/ die sein Gottes Kinder/ welche vom Geist Gottes getrieben werden/ Rom. 8.

Beza in colloq. Mompelgartens. pag. 445. Item in 1. parte Resp. ad acta coll.

Das ander Sacrament ist das heilige Nachtmal. Ehe wir aber solches empfangen/ sollen wir zuvor dem Kirchendiener Beichten/ vnd die Absolution von ihm begehren. Denn der H. Er. Christus in diesen Worten Johan. am 20. Welchen ihr die Sünd vergebt/ denen sind sie vergeben/ nicht allein die allgemeine Beicht vnd Absolution/ sondern auch die Privat vnd Sonderbeicht vnd Absolution bekräftiget/ daß ein jeder insonderheit seinen Seelsorger kan Beichten/ vnd die Absolution von ihm empfangen/ wie denn in vnsern Christlichen Evangelischen Kirchen breuchlich/ dann der Prophet Nathan insonderheit dem David/ Christus dem Sichtsbrüchtigen Matth. am 9. der Marie Magdalene Luce 7. vnd Paulus dem Corinthier 2. Cor. 2. Der H. Ambrosius dem Kenser Theodosio/ insonderheit die Absolution gesprochen/ vnd mitgetheilt hat. Ist aber ohne noth/ daß man dem Kirchendiener alle Sünde beichte/ wie im Babstthum geschieht/ sondern es ist gnug/ dz ein jeder nach seinem stand auß den H. zehen Geboten beichte/ wie er dieselbigen überretten habe mit bösen gedanken/ wortten vnd wercken/ wie droben erzehlet worden/ ja daß wir jern in Sünden empfangen vnd geboren/ vnd hetten die Hölle verdienet/ aber der

Von der Christlichen Beicht/ vnd Absolution.

2. Reg. 12.